

vat, ut in illo sis, quam in te incubbit, ut si te subduxeris, cadat. Ille si se subduxerit, cades tu : tu te si subduxeris, non cadet ille. Quid ergo est : « Deus in medio ejus? » Hoc significat quod æquus est omnibus Deus, et personas non accipit. Quomodo enim illud quod in medio est, paria habet spatia ad omnes fines : ita Deus medius esse dicitur, æqualiter omnibus consulens : « Deus in medio ejus, et non commovebitur. » Unde non commovebitur? Quia in medio ejus Deus. « Adjuvavit eam Deus vultu suo. Ille est adjutor in tribulationibus, quæ in venerunt nos nimis. Adjuvabit eam Deus vultu suo. » Quid est, « Vultu suo? » Demonstratione sua. Quomodo se demonstrat Deus, ut vultum ejus videamus? Jam commemoro, didicistis præsentem Deum, didicimus per opera. Quando ab illo aliquid adjutorii accipimus, ita ut omnino non dubitemus a Domino nobis esse concessum, vultus Dei nobiscum est. « Adjuvabit eam Deus vultu suo. »

X. « Conturbatae sunt gentes. » Et quomodo conturbatae? Utquid conturbatae? Ut dejicerent civitatem Dei, in cuius medio Deus? ut everterent tabernaculum sanctificatum, quod adjuvat Deus vultu suo? Non. Sed jam salubriter conturbatae gentes. Quid enim sequitur? « Et inclinata sunt regna<sup>1</sup>. Inclinata, inquit, sunt regna : » Jam non erecta, ut sœvirent; sed inclinata, ut adorarent. Quando inclinata sunt regna? Quando factum est quod prædictum est in alio Psalmo: « Adorabunt eum omnes reges terræ, omnes gentes servient ei<sup>2</sup>. » Quæ res fecit ut inclinarentur regna? Quæ res, audi: « Dedit vocem suam Altissimus, et mota est terra. » Arreptitii idolorum tanquam ranæ de paludibus personabant, tanto tumultuosius, quanto sordidius de luto et coeno. Et quid strepitus

<sup>1</sup> Psal. XLV, 7. — <sup>2</sup> Id. LXXI, 11.

ranarum ad tonitrua nubium? Inde enim « Dedit vocem suam Altissimus, et mota est terra : » tonuit de nubibus suis. Quæ sunt nubes ejus? Apostoli ejus, prædicatores ejus, de quibus intonabat præceptis, coruscabat miraculis. Ipsa nubes qui et montes: montes propter altitudinem et firmitatem, nubes propter pluviam et ubertatem. Irrigaverunt enim terram nubes istæ, de quibus dictum est: « Dedit vocem suam Altissimus, et mota est terra. » De his enim nubibus minatur cuidam vineæ sterili, unde translati sunt montes in cor maris. « Mandabo, inquit, » nubibus meis ne pluant super eam imbrem<sup>1</sup>. » Hoc impletum est in eo quod commemoravimus, quando translati sunt montes in cor maris: quando dictum est: « Ad vos missi eramus, sed quia respuistis verbum Dei, imus ad Gentes<sup>2</sup>: » impletum est, « Mandabo nubibus meis, ne pluant super eam imbrem. » Denique ipsa gens Iudea modo sic remansit, tanquam vellus siccum in area. Nam et hoc nostis contigisse in quodam miraculo. Area siccata erat, vellus solum madebat: sed pluvia in vellere non apparebat<sup>3</sup>. Sic et sacramentum Novi Testamenti non apparebat in gente Iudeorum. Quod illic vellus, hic velum: velatum enim erat sacramentum in vellere. In area vero, in omnibus Gentibus patet Evangelium Christi: pluvia manifesta est, nuda est gratia Christi: non enim tegitur velamento. Ut autem exiret inde pluvia, expressum est vellus. Per pressuram enim a se excluderunt Christum, et Dominus jam de nubibus suis compluit aream, vellus siccum remansit. Inde ergo « Dedit vocem suam Altissimus, » de istis nubibus, per quam vocem regna inclinarentur, et adorarent.

XI. « Dominus virtutum nobiscum, susceptor noster Deus Jacob<sup>4</sup>. » Non quicumque homo, non potestas

<sup>1</sup> Isaï. v, 6. — <sup>2</sup> Act. XIII, 46. — <sup>3</sup> Judic. vi, 37, 38. — <sup>4</sup> Psal. XLV, 8.

quælibet, non denique Angelus, non aliqua creatura, sive terrena, sive cœlestis, sed « Dominus virtutum nobiscum, susceptor noster Deus Jacob. » Qui misit Angelos, venit post Angelos, venit ut ei servirent Angeli, venit ut homines faceret æquales Angelis. Magna gratia. « Si Deus pro nobis, quis contra nos? Dominus virtutum nobiscum. » Quis Dominus virtutum nobiscum. » Si Deus pro nobis, inquam, quis contra nos? Qui Filio suo proprio non pepercit, sed pro nobis omnibus tradidit illum, quomodo non et cum illo omnia nobis donavit<sup>1</sup>? » Ergo securi simus, in tranquillitate cordis nutriamus bonam conscientiam de pane Domini. « Dominus virtutum nobiscum, susceptor noster Deus Jacob. » Quantacumque sit infirmitas tua, vide quis te suscipiat. Aegrotat nescio quis, adhibetur medicus: susceptum suum dicit medicus aegrotum. Quis eum suscepit? Ille. Magna spes salutis, magnus medicus eum suscepit. Quis medicus? Omnis medicus præter illum homo est: omnis medicus qui venit ad infirmum, alia die infirmari potest, præter illum. « Susceptor noster Deus Jacob. » Fac te infantem parvulum omnino, quales a parentibus suscipiuntur. Qui enim non suscipiuntur, exponuntur: qui suscipiuntur, nutriuntur. Putas-nesic te suscepit Deus, quomodo infantem te suscepit mater tua? Non sic, sed in æternum. Tua enim vox est in illo Psalmo, « Quoniam pater meus et mater mea dixerunt me, Dominus autem assumpsit me<sup>2</sup>. Susceptor noster Deus Jacob. »

XII. « Venite, et videte opera Domini<sup>3</sup>. » Jam de hac susceptione quid fecit Dominus? Animadverte orbem terrarum, veni, et vide. Si enim non venis, non vides; si non vides, non credis; si non credis, longe stas: si credis, venis; si credis, vides. Quomodo enim venitur ad montem

<sup>1</sup> Rom. viii, 31, 32. — <sup>2</sup> Psal. xxvi, 10. — <sup>3</sup> Id. xlvi, 9.

istum? Numquid pedibus? numquid navibus? numquid pennis? numquid equis? Quantum attinet ad locorum spatia, ne satagas, ne conturberis, ipse ad te venit. Etenim ex lapide parvo crevit, et factus est mons magnus, ita ut impletet universam faciem terræ<sup>1</sup>. Quid vis ergo ad eum per terras venire, qui terras implevit? Ecce jam venit, evigila, crescendo et dormientes pulsat: si tamen non tantus in eis somnus est, qui etiam contra montem venientem obdurescant, sed audiant, « Surge qui dormis, et exurge a mortuis, et illuminabit te Christus<sup>2</sup>. » Multum enim erat Judæis videre lapidem. Lapis enim ille adhuc parvus erat: merito et parvum contempserunt, contemnendo offendiderunt, et offendendo quassati sunt; restat ut et conterrantur. Hoc enim de lapide illo dictum est: « Qui offenderit in lapidem illum, conquassabit eum; super quem venierit, conteret eum<sup>3</sup>. » Aliud est conquassari, aliud conteri: conquassari minus est quam conteri: sed neminem conterit excelsus veniens, nisi quem conquassaverit humilis jacens. Modo enim antequam veniat Dominus noster, humilier jacuit Judæis, et offenderunt in illum, et conquassati sunt: veniet postea in judicio suo clarus atque altus, magnus et potens; non infirmus ut judicetur, sed fortis ut judicet, et conterat eos qui conquassati sunt in eum offendendo. Lapis enim offensionis et petra scandali non creditibus ipse est<sup>4</sup>. Ergo, charissimi, non est mirum, si Judæi non agnoverunt, quem tanquam parvulum lapidem ante pedes suos jacentem contempserunt: illi mirandi sunt qui adhuc tam magnum montem nolunt agnoscere. Judæi in lapidem parvum non videndo offendiderunt, hæretici in montem offendunt. Jam enim crevit ille lapis; jam dicimus illis: « Ecce impleta est prophetia Danielis, lapis ille qui erat parvus, factus est mons mag-

<sup>1</sup> Dan. ii, 35. — <sup>2</sup> Ephes. v, 14. — <sup>3</sup> Luc. x, 18. — <sup>4</sup> 1 Petr. ii, 8.

» nus, et implevit universam terram<sup>1</sup>. » Quare in illum offenditis, et non in illum ascenditis? Quis tam cæcus est ut offendat in montem? Quasi ideo ad te venerit ut habeas in quem offendas, et non habeas in quem ascendas. « Venite ascendamus ad montem Domini<sup>2</sup>. » Isaïas hoc dicit: « Venite ascendamus. » Quid est: « Venite ascendamus? Venite, » est credite; « ascendamus, » proficiamus. Isti autem nec venire volunt, nec ascendere, nec credere, nec proficere. Latrant contra montem. Jam in illum toties offendendo quassati sunt, et nolunt ascendere, semper eligentes offendere. Dicamus illis: « Venite, et videte opera Domini, quæ posuit prodigia super terram<sup>3</sup>. » Prodigia dicuntur, quod aliquid portendant, signa illa miraculorum, quæ facta sunt, quando mundus credidit. Et quid inde factum est, et quid portendebant?

XIII. « Auferens bella usque ad fines terræ<sup>4</sup>. » Hoc nondum videmus esse completum: sunt adhuc bella, sunt inter gentes pro regno; inter sectas, inter Judæos, paganos, Christianos, hæreticos sunt bella, crebrescent bella, aliis pro veritate, aliis pro falsitate certantibus. Nondum ergo completum est: « Auferens bella usque ad fines terræ: » sed fortasse complebitur. An et modo completum est? In quibusdam completum est: in tritico completum est, in zizaniis nondum completum est. Quid est hoc ergo: « Auferens bella usque ad fines terræ? » Bella dicit, quibus bellatur adversus Deum. Quis enim bellat adversus Deum? Impietas. Et quid potest facere Deo impietas. Nihil. Quid facit fictile vas elisum ad petram, quamvis vehementer elidatur? Tanto majore malo suo venit, quanto majore impetu venerit. Hæc bella magna erant, crebra erant. Contra Deum impietas dimicabat, et vasa fictilia conterebantur: præsumendo de se homines, de

<sup>1</sup> Dan. n, 35. — <sup>2</sup> Isaï. II, 3. — <sup>3</sup> Psal. XLV, 9. — <sup>4</sup> Ibid. 10.

virtute sua multum prævalendo. Cujus rei scutum etiam Job dixit de quodam impio: « Cucurrit adversus Deum in crassa cervice scuti sui<sup>1</sup>. » Quid est, « In crassa cer-vice scuti sui? » Nimium præsumendo de protectione sua. Numquidnam isti tales erant qui dicebant: « Deus noster refugium et virtus, adjutor in tribulationibus quæ invenerunt nos nimis<sup>2</sup>. » Autin alio Psalmo, « Non enim in arcu meo sperabo, et brachium meum non sal-vabit me<sup>3</sup>. » Quando quisque cognoscit quia in se ipso nihil est, et adjutorium de se nullum habet, arma in illo confracta sunt, bella sedata sunt. Talia ergo bella delevit vox illa Altissimi de nubibus sanctis, qua terra commota est, et inclinata sunt regna: abstulit hæc bella usque ad fines terræ. « Arcum conteret, et confringet arma, et scuta comburet igni<sup>4</sup>. » Arcus, arma, scuta, ignis. Arcus est, insidiæ; arma, publica oppugnatio; scutum, vana præsumptionis protectio. Ignis quo ista comburuntur, est de quo Dominus ait: « Ignem veni mittere in terram<sup>5</sup>. » De quo igne dicit Psalmus: « Et non est qui se abscondeat a calore ejus<sup>6</sup>. » Fervente igne isto, nulla in nobis impietatis arma remanebunt, necesse est ut omnia confringantur, conterantur, comburantur. Remaneas inermis non habens ullum adjutorium tuum: et quanto magis infirmus es, nulla tua arma habens, tanto magis te suscipit, de quo dictum est: « Susceptor noster Deus Jacob. » Valebas enim quasi per te, conturbaris in te. Perde arma quibus præsumebas: audi Dominum dicentem: « Sufficit tibi gratia mea. » Dic et tu: « Quando infirmor, tunc fortis sum. » Apostoli vox est. Omnia arma sua perdidérat tanquam fortitudinis suæ, qui dicebat: « Ego autem non gloriabor, nisi in infirmitatibus meis<sup>7</sup>: » velut si

<sup>1</sup> Job. xv, 26. — <sup>2</sup> Psal. XLV, 2. — <sup>3</sup> Id. XLIII, 7. — <sup>4</sup> Id. XLV, 10. — <sup>5</sup> Luc. xii, 49. — <sup>6</sup> Psal. XVIII, 7. — <sup>7</sup> 2 Cor. XII, 9, 10.

diceret : Non curro adversus Deum in crassa cervice scuti  
 mei : « Qui prius fui blasphemus , et persecutor, et inju-  
 » riosus<sup>1</sup> : sed ideo misericordiam consecutus sum , ut in  
 » me ostenderet Christus Jesus omnem longanimitatem in  
 » eos qui credituri sunt illi in vitam æternam<sup>2</sup>. Auferens  
 bella usque ad fines terræ . » Quando autem nos Dominus  
 suscepit , numquid inermes dimittit ? Arma nos , sed aliis  
 armis , evangelicis , veritatis , continentiae , salutis , spei ,  
 fidei , charitatis. Hæc arma habebimus , sed non a nobis.  
 Arma autem quæ a nobis habuimus , arserunt : si tamen  
 igne illo Spiritus sancti accensi sumus , de quo dicitur :  
 « Et scuta comburet igni. » Qui potens in te esse cupiebas ,  
 infirmum te fecit Deus , ut fortem te faceret de se , quia  
 infirmabar is de te.

XIV. Quid ergo sequitur ? « Vacate. » Ad quam rem ?  
 « Et videte quoniam ego sum Deus<sup>3</sup>. » Hoc est , Non vos ,  
 sed ego sum Deus : ego creavi , ego recreo ; ego formavi ,  
 ego reformatio n ; ego feci , ego reficio. Si non potuisti facere  
 te , quomodo potes reficere te ? Hoc non videt tumultus  
 contentiosus animi humani : cui tumultui contentioso di-  
 citur : « Vacate , » id est , reprimite animos vestros a con-  
 tradictionibus. Nolite argumentari et tanquam armari et  
 contra Deum : alioquin vivunt arma nondum illo igne com-  
 busta. Si autem combusta sunt : « Vacate : » quia non  
 habetis unde pugnetis. Si autem vacaveritis in vobis , et a  
 me petieritis omnia , qui primo de vobis præsumebatis :  
 « Vacate , et videbitis quoniam ego sum Deus. »

XV. « Exaltabor in Gentibus , et exaltabor in terra. »  
 Paulo ante dixeram terræ nomine significari gentem Ju-  
 dæorum , maris nomine cæteras gentes. « Translati sunt  
 » montes in cor maris : conturbatae sunt gentes , inclinata  
 » sunt regna , dedit vocem suam Altissimus , et mota est

<sup>1</sup> Job. xv, 25. — <sup>2</sup> 1 Tim. i, 13-16. — <sup>3</sup> Psal. XLV, 11.

» terra. Dominus virtutum nobiscum , susceptor noster  
 » Deus Jacob<sup>1</sup>. » Facta sunt miracula in Gentibus , im-  
 pletur fides Gentium , ardenter aarma præsumptionis humanæ :  
 vacatur in tranquillitate cordis , ut cognoscatur auctor  
 Deus omnium munierum suorum. Et post istam clarificatio-  
 nem , numquid deserit et plebem Judæorum , de qua di-  
 cit Apostolus : « Dico enim vobis , ut non sitis vobis sapien-  
 » tes , quia cæcitas ex parte Israël facta est , donec pleni-  
 » tudo Gentium intraret<sup>2</sup>? » Id est , donec montes hoc  
 transferrentur , nubes hic pluerent , hic Dominus tonitruo  
 suo regna inclinaret : « Donec plenitudo Gentium intra-  
 » ret. » Et quid postea ? « Et sic omnis Israël salvus  
 » fieret<sup>3</sup>. » Ideo et hic ipsum ordinem servans : « Exalta-  
 » bor , inquit , in Gentibus , et exaltabor in terra : » id est ,  
 et in mari et in terra : ut jam omnes dicant quod sequitur :  
 « Dominus virtutum nobiscum , susceptor noster Deus  
 » Jacob. »

## ENARRATIO

### IN PSALMUM XLVI.

#### Sermo ad plebem.

I. DOMINUS Deus noster fidem in qua vivimus , et ex  
 qua vivimus , per libros sanctos , Scripturas sanctas multi-  
 pliciter nobis varieque diffudit , sacramenta quidem ver-  
 borum varians , fidem tamen unam commendans. Una enim  
 eademque res ideo multis modis dicitur , ut modo ipso

<sup>1</sup> Psal. XLV, 12. — <sup>2</sup> Rom. xi, 25. — <sup>3</sup> Ibid. 26.